

Minister di Defensa Hulandes Jeanine Hennis ta bishita region Caribense otro siman

Na Aruba e ta bishita trayecto Formacion Social

MINISTER di Defensa Hulandes Sra. Jeanine Hennis-Plasschaert y Comandante di Forsanan Militar Tom Middendorp, ta haci un bishita di trabou na e islanan Aruba, Bonaire y Corsou. Riba e islanan e mandatario ta wordo informa extensivamente dor di Marina Real y Kustwacht den e parti Caribense aki. E bishita di trabou ta cuminsa na Corsou, na unda e Minister ta papia cu entre otro Daniel Hodge, Minister Presidente di e isla. Na Parera, e base di Marina, e Comandante di Forsanan Naval di e region Caribense General di Brigada di Marina Dick Swijgman, ta informa Minister Hennis riba e forma di traha di marina den e region y e operacionnan andando pa lora ta intercepcion di droga. Tambe ta sigui un guia extenso riba e base, na unda e minister ta papia cu entre otro e compania di ehercito, e per-

sonal cu ta mantene e material cu ta wordo uza tanto riba tera como lama y e tripulacion di Hr.Ms. Pelikaan. Na Marinierskazerne Suffisant Hennis ta cera conoci cu e militarnan cu ta hayando nan formacion. Cu e cutter Panter e delegacion ta wordo treci Aruba. Na Aruba e minister tin un encuentro cu Gobernador Fredis Refunjol y Prome Minister Mike Eman. Despues ta sigui un bishita na Marinierskazerne Savaneta. Eynan Hennis ta papia cu e mariniernan di e di 32 Infanteriecompagnie. E unidad aki semper ta para cla pa asisti den caso di calamidad di horcan. Tambe e minister ta haci un bishita na e punto di sosten di kustwacht y Trayecto Formacion Social. E minister ta finalisa su bishita di trabou na Bonaire cu un deliberacion bilateral cu gezaghebber a.i. Wilbert Stolte. Finalmente Hennis y

Middendorp ta haci un bishita na e brigada di marechaussee riba e isla, cu ta responsabel pa asuntonan di aduana. Prome Minister Eman tabata na Hulanda na luna di December na unda el a cera conoci cu e minister nobo di Defensa Jeanine Hennis-Plasschaert. Durante e combersacion ey na unda Minister de Meza tambe tabata presente, Eman un bes mas a enfatisa cu presencia di Marina riba nos isla no ta solamente importante pa Aruba, pero pa henter Reino y pa estabilidad den e region. "E interes ta bay mas leu cu solamente defensa. Kazerne ta hunga un rol importante den e trayecto di Formacion Social y ta asisti tambe den casonan di calamidad. Ademas nos ta haci ehercicionan militar hunto. E ministernan anterior di Defensa Hillen y Van Middendorp

koop a haci hopi esfuerso pa tene Marinierskazerne habri. Aruba ta hopi contento cu Minister Hennis-Plasschaert cu e mesun fimesa a afirma cu kazerne ta keda intacto. Nos ta agradecido pa esaki, sigur pasobra cu nos ta consciente cu Hulanda mester austerisa grandemente, tambe riba Defensa", Eman a bisa e tempo ey. Durante e combersacion na December, Eman kende a inicia 'Trayecto Formacion Social' a informa Minister Hennis-Plasschaert di e ultimo desaroyonan di e proyecto aki. Un proyecto cu a resulta masha exitoso y cu ta wordo ehecuto hunto cu Marinierskazerne Savaneta. Fin di november e prome grupo di 9 hoben a termina e trayecto exitosamente. Eman "Minister Hennis-Plasschaert tabata contento di tende cu e

prome grupo a slaag y cu algun di nan tin trabou caba. Un certificado di e trayecto Formacion Social ta fortifica e oportunidadnan di e hobennan aki riba mercado laboral", Eman a splica. Despues di a tende e splicacion di Eman, Hennis-Plasschaert a bisa cu e tin masha gana di bishita e hobennan di e trayecto Formacion Social durante su bishita na Aruba. Segun Eman e minister di Defensa Hulandes a mustra gran interes den Aruba y cooperacion dentro di Reino. "Esaki ta duna nos e confiansa cu nos por traha bon cu e minister aki". Minister Hennis-Plasschaert ta otro siman na Aruba y riba su programa tin un bishita planea na e hobennan di 'Trayecto Formacion Social'.

